

THE ARUBAN RESORT TA DEN SU ULTIMO ROSEA



Ayera nochi AWEMainta a haya e informacion cu e doñonan di The Aruban Resort a notifica cu definitivamente nan no a keda cla cu e refinanciamiento di e hotel. Esaki ta encera cu e caso pa declara e compania aki bancarota lo continua diabierna y e posibilidad cu huez lo dicta e sentencia aki ta mucho mas grandi ainda di loke e tabata ayera.



Fraccion di MEP den Parlamento ta acusa

Mientras cu famianan ta perdiendo trabao, Ministernan ta biaha pa loco y Minister Presidente ta atende concierto na Hulanda

NA Aruba ta hopi t'e famianan cu ta pasando den momentonan dificil. Especialmente esnan cu ta perdiendo trabao, pa motibo di persecucion politico di Gobierno. Tambe e trahadornan di 'The Aruban Resort', cu pa falta di curashi di e Gobierno aki, awor mester bay cas met prome cu Pasco. Den su afan pa castiga esnan cu por a mostra nan sosten n'e Gobierno anterior, e Gobierno aki ta kitando hopi mama y tata for di trabao, y entre nan hendenan cu a sostene nan mes partido. Sin importa con e famianan aki lo pasa dianan di fiesta, Gobierno aki a cuminsa caba cu malgastamento di placa. Asina un comunicado di fraccion di MEP ta comenta.

Diferente Minister ta biahando constantemente, mientras ta bisa cu no tin placa pa paga empleadonan publico cu a wordo emplea den e ultimo lunanan. Ministernan Otmar Oduber y Mike Eman a biaha pa



Hulanda algun siman pasa, despues Otmar Oduber a bay Merca tambe, Minister Mike de Mesa a bay New York pa reuni cu PetroChina, awor Ministernan Mike Eman cu Benny Sievinger hunto cu Richard Visser a bolbe biaha pa Hulanda, Minister drs. mr. Arthur Dowers a biaha pa Sint Maarten y Minister Mike de Mesa ta prepaando pa biaha pa Suriname. Y tur esaki den menos di un luna y mei di gobernacion. Ta manera un racha di biahamento den 'first class' tin den e



Gobierno nobo aki.

Pa colmo, den e relato di prensa di e biahe di Minister Presidente Mike Eman, fraccion di MEP por a lesa cu e punto culminante di su biahe na Hulanda ta cu e lo atende un concierto na Hulanda. Con un Gobierno cu a hunga cu dolor di pueblo pa tanto luna, awor no ta realisa e problemanan cu nan ta ocasiona den nos pais, y cu unico cos cu nan ta haci ta biaha y gasta placa, fraccion di MEP a conclui nan critica.

Si trahadornan di The Aruban Resort no wordo paga diabierna huez lo dicta sentencia den caso di peticion di bancarota

RUDY Geerman di sindicato FTA tabata presente ayera na corte den cuadro di e caso di bancarota di The Aruban Resort. El a bisa mirando cu a dicidi di core e fecha di tratamiento di e caso te diabierna, cu esaki ta un extension di e problema.

Huez a tuma na consideracion e peticion di e contrapartido pa trata e caso diabierna caminda cu nan ta asumi cu pa e dia ey nan lo por haya e refinanciamiento cual ta wordo busca for di e ultimo 8 lunanan.

Geerman ta indica cu nan a sinta na mas cu 10 ocasion cu gerencia pero nada no a bin afor. Awor nan lo a priminti cu pa diabierna awor e trahadornan lo wordo paga y si esaki ta e caso no lo tin caso den corte pa bancarota.

Huez a bisa cu e no kier acudi diabierna pa tende ta ki dia e trahadornan ta wordo paga, sino cu e trahadornan a wordo paga caba. De lo contrario, el lo dicta sentencia pa 9'or di mainta.

FTA ta bisa cu ohala e trahadornan por haya placa, pero manera huez mes a bisa, haya placa diabierna no ta soluciona e problema, pasobra dia 25 lo yega atrobe y un biaha mas lo tin problema.

Tambe Rudy Geerman a bisa cu por a compronde cu hopi trahador no ta di acuerdo pa bancarota y mester respeta nan opinion, pero di biaha ta bisa cu mester puntra ta dicon.



Di acuerdo cu MEP

Gobierno a defrauda trahadornan di 'The Aruban Resort'

FRACCION di MEP den Parlamento a tuma nota di e desaroynan relaciona cu e bancarota di 'The Aruban Resort', y e critica di e trahadornan cu ta lamenta profundamente e wegá cu Gobierno a hunga cu nan. Minister di Turismo, Otmar Oduber a papia cu nan, pero ora a yega e punto mas importante, Gobierno a lubida riba e trahadornan.

Minister Presidente, mr. Mike Eman mes a biaha pa atende un concierto na Hulanda, Minister nan di Husticia, di Salubridad y di Obras Publico, respectivamente drs. mr. Arthur Dowers, Richard Visser, Benny Sevinger, tur ta di biahe, y a laga un of dos Minister so atras pa atende cu e asunto asina serio aki.



Parlamentario Laina Westerhof di AVP te hasta a priminti e trahadornan cu e Minister lo bin cu un solucion, pero e Minister a prefera di laga interes di WEB y ELMAR prevalece riba interes di 200 famia na Aruba, hopi di nan cu a deposita nan confianza

den e partido AVP mes!

Ex Minister di Turismo, ing. Edison Briesen a splica cu Gobierno anterior a papia na diferente ocasion cu e compania aki, pa purba yega na un solucion. Eddy Briesen a bisa cu goberna

no ta facil, y te hasta a ofrece su ayudo n'e Minister actual, Otmar Oduber.

E hotel mientrastanto a informa tur su huespednan cu nan mester sera e hotel, debi cu Gobierno a nenga di saca un man

n'e momento mas critico. Esaki lo causa un daño sumamente grandi n'e imagen di Aruba den exterior.

Lamentablemente awor e hotel lo bati bancarota, y e trahadornan lo perde nan trabao, según MEP.

Doñonan di The Aruban Resort no a keda cla cu refinanciamiento



AYERA nochi AWEMainta a haya e informacion cu e doñonan di The Aruban Resort a notifica cu definitivamente nan no a keda cla cu e refinanciamiento di e hotel. Esaki ta encera cu e caso pa declara e compania aki bancarota lo continua diabierna y e posibilidad cu huez lo dicta e sentencia aki ta mucho mas grandi ainda di loke e tabata ayera.

Por a compronde cu lo notifica huez di e desaroyo aki via di mr. Anthony Ruiz cu ta nan abogado na Aruba y lo por tin chens cu huez dicidi di adelanta tratamento di caso pa awew diahuebs mes, mirando cu no tin otro solucion na bista.

Si haya refinanciamiento pa The Aruban Resort

Tin un compania prestigioso cla pa run e hotel

ABOGADO Anthony Ruiz, abogado di The Aruban Resort a indica cu su cliente loke a solicita ta un extension di e tratamento di e caso di bancarota di e resort. Esaki pasobra nan ta bezig cu e ultimo plan di rescate pa salba e compania, cu nan ta hopi cerca di un refinanciamiento y a bisa huez pa dunanan 2 dia. Si nan no logra den dos dia haya e refinanciamiento, e ora e por pronuncia e bancarota.

Mr. Ruiz ta bisa cu ta na interes di tur trahador pa no declara bancarota, pasobra si esaki ta e caso e ora tur cos a caba, mientras tanto si esaki no wordo declara, ainda tin chens pa bin cu un plan di rescate, tur hende por haya

nan trabou bek.

Ademas e cliente di mr. Ruiz a indica cu e no lo bay run e hotel mas, cu el lo laga esaki wordo haci dor di otro compania profesional cu cual nan tin contract firma caba. Tambe den e dos dianan aki lo bin un crisis manager pa yuda y si e placa mester drenta promer cu diabierna mainta 9'or, e ora por bisa cu e compania ta rescata. Pero ainda tin otro debenan pa paga manera WEB y Elmar. Es decir, pa diabierna awor no solamente mester tin placa pa e trahadornan, pero tambe pa WEB y Elmar, sin conta tur e otro companianan cu por ta nan tin debe cerca nan. Diamars a keda te banda di 3'or di marduga cu abogado di FTA y otro abogadonan pa wak

kico por haci pa yega na un solucion di e asunto aki.

Diabierna awor lo mester presenta dilanti huez no solamente cu e salario a wordo paga, pero tambe cu lo tin placa pa sigui paga e salario di e lunanan cu ta bin. Na e momentonan ai tin solamente 200 mil y esaki no ta suficiente y lo tin mester di por lo menos 2 pa 3 miyon pa segura e salarionan siguiente.

Mr. Ruiz ta bisa cu e plan di su clientenan ta cu asina e refinanciamiento bin, placa ta drenta y tin un compania prestigioso cla cu kier drenta, pero nan rekisito ta cu e resort mester ta sin ningun problema, pasobra nan no lo kier bay susha nan nomber.

